

Na osnovu člana 20. stav 1. tačka 1. Zakona o slobodi pristupa informacijama u Federaciji Bosne i Hercegovine ("Službene novine Federacije BiH", broj: 32/01) Vlada Bosansko-podrinjskog kantona Goražde, na svojoj 126.redovnoj sjednici održanoj dana 19.09.2005. godine, objavljuje

V O D I Č
KROZ POSTUPAK ZA OSTVARIVANJE PRAVA
NA PRISTUP INFORMACIJAMA KOJIMA RASPOLAŽE
VLADA BOSANSKO-PODRINJSKOG KANTONA

I. PRAVO PRISTUPA INFORMACIJAMA

Pravo pristupa informacijama koje su pod kontrolom Vlade Bosansko-podrinjskog kantona Goražde ima svako pravno i fizičko lice.

Vlada Bosansko-podrinjskog kantona Goražde će saopćiti informacije koje su pod njenom kontrolom u skladu sa odredbama Zakona o slobodi pristupa informacijama i propisanom, odnosno ustanovljenom procedurom.

II. OGRANIČENJE PRISTUPA INFORMACIJAMA

Pravo pristupa informacijama može se ograničiti samo na način i pod uslovima propisanim Zakonom.

III. UTVRĐIVANJE IZUZETAKA

Vlada Bosansko-podrinjskog kantona Goražde, kao organ izvršne vlasti će utvrditi izuzetom od saopćavanja onu informaciju koja je u suprotnosti sa interesima i okolnostima propisanim u Zakonu, nakon svestrane ocjene svakog pojedinog slučaja, a naročito:

- a) ako utvrdi izuzetak u smislu člana 6.7. i 8. Zakona o slobodi pristupa informacijama ("Službene novine Federacije BiH", broj: 32/01), za cijelu ili dio informacije, i
- b) ako utvrdi, nakon objavljenog ispitivanja javnog interesa u smislu člana 9. prethodno navedenog Zakona, da saopštavanje nije u javnom interesu.

IV. ISPITIVANJE JAVNOG INTERESA

1. Vlada Bosansko-podrinjskog kantona Goražde će obavezno provesti ispitivanje javnog interesa u skladu sa članom 9. Zakona o slobodi pristupa informacijama.
2. Prilikom ispitivanja javnog interesa Vlada će uzeti u obzir svaku korist i štetu koje mogu prosteći iz saopštavanja informacije zasnovane na elementima u odnosu na koje bi se moglo cijeniti hoće li biti povrijeđena lična privatnost trećeg lica, legitimni ciljevi FBiH i povjerljivi komercijalni podaci trećih lica.
3. Vlada će saopštiti traženu informaciju bez obzira na izuzetak utvrđen u skladu sa članom 6.7. i 8. citiranog Zakona ako je to opravdano javnim interesom.

4. Ako se utvrdi da je saopštavanje tražene informacije (koja je utvrđena kao izuzetak u smislu člana 6. 7. i 8. citiranog zakona) u javnom interesu Vlada će rješenjem obavijestiti treću stranu da će joj informaciju saopštiti po isteku roka od 15 dana od prijema tog rješenja, u skladu sa članom 9. tačka 3. Zakona o slobodi pristupa informacijama u Federaciji Bosne i Hercegovine, protiv kojega se može izjaviti žalba u daljem roku od 8 dana od prijema istog, organu nadležnom za odlučivanje po žalbi.

Pored prava na izjavljivanje žalbe, korisnik informacije iz rješenja ima pravo da se obrati instituciji ombudsmena FBiH.

5. Ako je dio informacije utvrđen kao izuzetak, Vlada izdvaja taj dio i saopćava ostatak informacije, osim ako usljed ovog izdvajanja, informacija nije postala nerazumljiva.

V. POSTUPAK PRISTUPA INFORMACIJAMA

1. Zahtjev u pismenoj formi (čiji je sadržaj obuhvaćen ovim vodičem) podnosi se Vladi Bosansko-podrinjskog kantona Goražde, na jednom od službenih jezika u upotrebi u F BiH.
2. Zahtjev mora imati dovoljno podataka o obliku, odnosno prirodi informacije kako bi se omogućilo da davalac informacije (Vlada) uz razuman napor pronađe i stavi na uvid traženu informaciju.
3. Zahtjev za davanje informacije mora biti potpisan od osobe koja istu zahtjeva, sa tačnom adresom prebivališta, odnosno boravišta i JMBG.
4. Zahtjev se predaje preko pisarnice Zajedničke službe kantonalnih organa u ulici Višegradska 2a, a može se preuzeti u istoj Službi ili na službenoj web stranici BPK-a Goražde www.bpkgo.ba
5. Zahtjev koji se odnosi na ličnu informaciju podnosioca zahtjeva, pored prethodno navedenih podataka i uslova, može podnijeti samo fizičko lice na koje se zahtjev odnosi, odnosno njegov zakonski zastupnik ili lice koje podnosioc zahtjeva pismeno ovlastio za pristup informaciji.
6. Ako zahtjev podnese fizičko lice na koje se zahtjev odnosi, to lice je dužno da potpiše zahtjev i pokaže propisanu ličnu ispravu sa fotografijom, dokaz o zakonskom zastupanju, odnosno punomoć, kao i kopiju lične isprave podnosioca zahtjeva.
7. Službenik Vlade Bosansko-podrinjskog kantona Goražde za informiranje koji obrađuje upućene zahtjeve je Herenda Kamil.

VI. NEMOGUĆNOST POSTUPANJA U SKLADU SA ZAHTJEVOM

1. Ako Vlada Bosansko-podrinjskog kantona Goražde nije u mogućnosti da udovolji zahtjevu zbog nepostojanja prethodno navedenih formalnih uvjeta, propisanih u članu 11. stav 2. i 3. Zakona o slobodi pristupa informacijama, Vlada će najkasnije u roku od 8 dana od dana prijema ovog zahtjeva rješenjem obavijestiti podnosioca zahtjeva da zahtjev ne može biti obrađen iz istaknutih razloga.
2. Protiv rješenja iz prethodne tačke može se izjaviti žalba organu nadležnom za njeno razmatranje sa troškovima i pravom obraćanja Instituciji ombudsmena u Federaciji BiH.

VII. POSTUPANJE NAKON PRIJEMA ZAHTJEVA

1. Nakon što Vlada razmotri zahtjev i odobri pristup informaciji, u cjelosti ili djelimično, donijet će rješenje, te isto dostaviti podnosiocu zahtjeva.
2. Navedeno rješenje sadrži:
 - obavještenje o mogućnosti ličnog pristupa informaciji u prostorijama Vlade, ministarstva ili kantonalne službe

- obavještenje o mogućnosti umnožavanja informacije i o troškovima umnožavanja informacije, s tim da se informacija omogućava nakon izvršene uplate,
 - prilog kopije tražene informacije, kada se ista osigurava besplatno.
3. Ako Vlada odbije pristup informaciji u cjelosti ili djelimično, donijet će rješenje kojim će obavijestiti podnosioca zahtjeva.

Navedeno rješenje sadrži:

- zakonski razlog za izuzeće tražene informacije,
 - pouku o pravu na žalbu, uz troškove, kao i pravo obraćanja Instituciji ombudsmena.
4. Rješenje se dostavlja što je prije moguće, a najkasnije u roku od 15 dana od dana prijema zahtjeva, a isti se rok može produžiti, o čemu podnosilac zahtjeva mora biti obaviješten na pogodan način.
 5. Po zahtjevima za pristup informacijama rješavat će komisija koju će u tu svrhu formirati Vlada Bosansko-podrinjskog kantona Goražde.

Po žalbama na rješenja komisije iz prethodnog stava odlučivat će Vlada Kantona.

VIII. TROŠKOVI UMNOŽAVANJA

1. Vlada ne naplaćuje taksu ili naknadu za podnesene zahtjeve, rješenja ili obavještenja u smislu ovog Zakona.
2. Cijena se podnosiocu zahtjeva određuje samo za troškove umnožavanja, a utvrđuje se u skladu sa Uputstvom kojeg je donio Federalni ministar pravde.
3. Podnosilac zahtjeva za svaku stranicu zahtjevano informacije, ne plaća ništa za prvih 10 stranica standardne veličine, te 0,50 KM za svaku stranicu standardne veličine koja prelazi prvih 10 besplatnih stranica.
4. Podnosilac zahtjeva plaća 5,00 KM po disketi za elektronsku dokumentaciju.
5. Uplata naknade za umnožavanje informacije preko 10 strana ili uplata po disketi za elektronsku dokumentaciju, vrši se kod CBS Bank d.d. Sarajevo, Filijala Goražde na žiro-račun broj: 173-104-10002931-70, vrsta prihoda 722791, šifra budžetske organizacije 2801001
6. Vlada će odrediti službenika koji će primati uplate za troškove iz tačaka 3. i 4. i o tome izdati odgovarajuću priznanicu i voditi odgovarajuću evidenciju.

OVAJ VODIČ NALAZI SE U SLUŽBI ZA ODNOS SA JAVNOŠĆU KOD KAMILA HERENDE KOJI JE UJEDNO OVLAŠĆENA OSOBA ZA INFORMIRANJE.

Kontakt telefoni:

038/ 221-212; 038/ 222-253

PREMIJER

mr. Salko Obhođaš